

四庫全書

史部

欽定四庫全書

平定準噶爾方略續編卷九

乾隆二十六年春正月壬寅

恩免甘省滿漢各營辦解馬匹預借銀兩

上諭大學士曰甘省連歲承辦軍需兵民俱為出力
其民間應徵錢糧已節年蠲免而昨歲雨暘時若
糴事大豐閭閻諒紓拮据惟滿漢各營歷年餉解
馬匹尚有預借銀兩雖屢次加恩豁免至八十餘

萬猶有九十餘萬之多應於各該營俸餉內扣還
第念兵弁等日用攸資按限坐扣必致艱窘茲大
功既藏惠恤宜宣所有預借銀兩著再加恩悉予
豁免用示朕體恤兵力至意

乙巳

命解送烏魯木齊馬匹於伊犁牧放

上諭軍機大臣曰安泰等奏稱烏魯木齊所有馬匹
頗多須蒙古兵丁牧放請旨於內地調取等語現

在伊犁設立牧場蒙古兵丁甚多則烏魯木齊馬
匹牲隻皆可解送伊犁交與阿桂編羣孳息著傳
諭安泰阿桂等知之

丙午

喀什噶爾辦事都統侍郎海明疏奏拏獲逃犯
烏朗噶等

海明奏言臣前奏拏獲逃犯烏朗噶之家屬七
口隨行文官長保等令其嚴拏烏朗噶務獲十

一月二十日據報二十六日在冲噶巴什之扣喀爾嶺追及逃犯等俱藏匿山險二十七日夜大雪官長保等同布魯特藍翎侍衛蒙古勒回人海爾圖等登山將烏朗噶及家屬十五口擒獲詢據供稱因曾管伯克霍集斯家務今聞將伊屬人送往京城是以挈眷逃走等語除將烏朗噶等解送阿克蘇辦理外謹將此次拏獲逃犯之官兵回人等列單具奏奏入

上諭軍機大臣曰官長保從前獲罪本應正法姑予革職自効此次拏獲逃犯尚屬奮勉著加恩授為藍翎侍衛冲噶巴什之阿瓦勒比等甚屬出力著分別賞給緞疋

戊申

參贊大臣阿桂等疏奏哈薩克貿易情形

阿桂等奏言十一月二十五日據洪郭羅鄂博卡倫委負報稱有哈薩克八十餘人帶馬五百

餘匹前來貿易臣等傳該頭目阿里等進見詢
係哈木巴巴遣伊子呼都雅爾同來臣等令都
司陳聖謨等作為商人以緞布交易畢於二十
九日遣回奏入報

聞

已酉

議解送伊犁牲隻事宜

軍機大臣奏言查阿桂等請買喀爾喀牛羊駝

隻編設牧羣經臣等議以恐礙喀爾喀等生計
仍照原議從達里剛愛等處牧羣揀選送往但
路遙不無疲乏正在遵

旨籌議適將軍成衮扎布來京會同商酌據稱烏里
雅蘇台有官駝一千六百隻牛二千八百隻羊
二萬四千餘隻蒙古等舊欠牲畜隻現在陸續交
納等語臣等擬將阿桂所取牲畜即於前項內
揀選送往既無礙喀爾喀生計又可省牧羣遠

送之勞至編羣解送必須間隔行走始不致蹂踐水草而官兵亦易於照看其烏里雅蘇台缺額應行文牧羣總管等照數送往抵補再從前因解送牲隻請

旨特派侍衛等官今既由烏里雅蘇台解送即以該處察看水草侍衛數員扎薩克一員照看官兵緩行解送其抵補烏里雅蘇台牲隻亦請令該總管等派出官兵俱照例給與行糧及整裝銀

兩所有派出在京侍衛應停其前往奏入
上從之

乙卯

命陞賞前軍參領富虎及商伯克墨墨氏敏等

喀什噶爾辦事都統侍郎海明奏言前奉

諭旨查拏搶掠臺站賊黨哈子莫斯和卓等務獲臣
訪得莫斯和卓逃往霍罕伊子現在布魯特即
行文額爾德尼伯克令將莫斯和卓拏解此次

派富虎至布魯特明伊勒哈處查拏逃犯烏朗
噶因訪得莫斯和卓之子瑪瑪第斯敏呢雅斯
和卓之長子呼岱巴爾氏次子阿舒爾藏匿處
所隨同商伯克墨墨氏敏前鋒校雙星保等前
往將瑪瑪第斯敏等全行擒獲又據布魯特冲
噶巴什等回人報稱貿易至布魯特之薩雅克
薩爾巴噶什遇三十餘人搶刦等語臣亦飭富
虎查辦據明伊勒哈遣伊子瑪木伯特等將為

首之瑪爾喀拜為從之沙巴圖等盡行擒獲瑪
爾喀拜情形頑梗直供不諱回衆等懇請除此
惡賊因即斬決梟示沙巴圖照回法斬其手指
所搶貨物全行查給商人領訖奏入

上諭軍機大臣曰富虎此次因偵緝逃犯烏朗噶訪
得搶臺賊黨莫斯和卓之子瑪瑪第斯敏等藏匿
處所即領官兵回人前往全行擒獲甚屬可嘉著
加恩賞給副都統職銜又

欽定四庫全書

平定準噶爾方略續編

卷九

六

諭曰海明奏商伯克墨墨氏敏托古薩克之密喇卜
伯克巴巴和卓俱自備資斧前往布魯特為富虎
嚮導安撫衆心偵獲賊犯等語墨墨氏敏等抒誠
効力甚屬可嘉著加恩賞緞各二端仍候應陞之
伯克缺出補用

訓飭都統侍郎海明調赴阿克蘇辦事以左都御史
永貴辦喀什噶爾事務

海明奏言本年六月邁喇木作亂時冲噶巴什

之烏默爾比率屬搶掠安集延商人牲隻銀兩
遠遁及阿瓦勒比自京轉回臣委令查緝今據
富虎報稱聞得烏默爾比在薩雅克即行詢問
據供原搶銀一千兩除阿瓦勒比索回四百兩
外尚存二百兩其餘係衆人分用等語將烏默
爾比家口帶來喀什噶爾臣即派伊沙噶伯克
阿卜都喇伊木等向分用銀兩之布魯特等查
追其烏默爾比係從前擾亂之時於卡倫外搶

掠若照瑪爾喀拜一體辦理情罪稍有不同臣
愚見請將烏默爾比之職銜革去或交阿瓦勒
比管轄或交奇卜察克布魯特散秩大臣阿奇
木管轄伏候

訓示奏入

上諭軍機大臣曰海明奏稱搶掠安集延商人貨物
之瑪爾喀拜已經正法其從前搶掠安集延之烏
默爾比情罪稍有不同請革退職銜交與該管約

束等語所辨非是冲噶巴什之布魯特乃喀什噶爾所屬與外藩回人不同必宜賞罰嚴明始足以昭懲勸即如阿瓦勒比抒誠効力既經加恩獎賞而烏默爾比乘亂搶掠自應正法示懲乃僅請革職管束甚屬姑息著將烏默爾比派員看守送京

又

諭曰海明辦理回部事務多未妥協即如從前葉爾羌伯克等以鄂對不稱阿奇木之任請將額敏和

卓補授一事自應嚴行查辦乃商之舒赫德方且
游移不決以為可不奏聞甚屬非是朕念其甫經
辦事姑從寬申飭此次又復姑息是海明竟不能
奮發有為喀什噶爾地通安集延等處與布魯特
等接壤較之葉爾羌雖通拔達克山相距尚遠者
其情形尤為緊要辦事大臣必得精明果斷之人
遇事始能妥協海明不稱喀什噶爾辦事之任現
命永貴前往更代舒赫德但抵任仍需數月著傳

諭舒赫德即赴喀什噶爾辦事令海明赴阿克蘇
與和其衷同辦事務看來阿克蘇辦理伊犁屯田
回人運送什物尚不甚難俟永貴抵喀什噶爾舒
赫德將現辦章程交代即行回京俱著傳諭知之

丙辰

賜哈薩克阿布賚等

勅書

皇帝勅諭哈薩克阿布賚阿布勒瑪木比特爾等使

人卓勒巴喇斯等與侍衛納旺俱安善前來朕即
召見加恩宴賚錫宴時賜爾阿布賚阿木勒瑪木
比特蟒錦緞疋器什茶芽各若干交使人齎回其
各祇受并賜來使翎頂冠服緞疋器什銀兩有差
至爾等所奏朕已鑒悉從前巴魯克巴圖爾搶掠
烏梁海等駐劄烏里雅蘇台將軍欲發兵問罪朕
念爾等素稱恭順不允所請特命侍衛納旺前往
諭令拏送罪人查還所掠爾阿布賚即同納旺親

行查辦送還烏梁海人口牲隻什物又遣使入覲
代巴魯克巴圖爾請寬朕為天下共主凡外藩歸
附人等果能自知其罪改過遷善亦姑予矜全惟
怙終不悛始加征討今巴魯克巴圖爾既惶懼祈
求而爾等又專使奏懇朕恩尚屬恭順巴魯克巴
圖爾著免其拏送治罪嗣後爾等惟加意約束所
部各守封疆善圖生計勿謂此次有請即允遂安
圖僥倖越境盜竊斯時將軍大臣等奏請發兵朕

亦不能姑息從事必致擾爾游牧於爾復有何益
爾等當以朕意徧諭所屬俾知遵守再爾等使人
拜克奈等轉回謬言愛古斯地方已蒙大皇帝賞
給哈薩克游牧經伊犁大臣查詢具奏從前使人
奏請在塔爾巴噶台游牧朕即諭以不應越境且
載在勅書而爾等屬人仍造言生事若此是徼倖
之心尚未止息已諭伊犁大臣等有哈薩克越境
游牧者即行驅逐今卓勒巴喇斯等所奏又有南

界綽爾郭西界沙喇擘勒中抵勒卜什等語凡此
數處皆厄魯特故地而爾使謂哈薩克俱有游牧
隱躍其詞希圖窺伺更屬倣倖試思我國家以大
兵平定之地豈可任爾等侵踞況爾等前為厄魯
特所擾雖現在游牧之處亦遠徙避去仍不能免
於搶掠今干戈寧靜共樂昇平爾等游牧並非狹
小乃妄行陳奏朕必不允是徒有貪得見小之名
倘妄生窺伺或轉至失其所有甚無謂也至爾等

所奏哈薩克全部已為臣僕願世世子孫永効悃
誠乞賜璽書為券等語朕嘉悅覽之爾等果能遵
朕所頒勅諭約束部衆各安生業自必永綏福祿
垂於萬年矣又爾阿布賚使人奏云爾所屬有三
人為烏梁海所獲乞查出發回所奏未為合理即
如巴魯克巴圖爾係獲罪之人理應拏送尚加恩
寬免此三人既為烏梁海所養何必瑣瑣校計
如必欲查還可將巴魯克巴圖爾拏送前來朕再

降諭旨適已命爾使傳諭因附及之爾等其各宜領悉特諭

戊午

命停購巴里坤撥缺馬匹由烏魯木齊等處送補

上諭軍機大臣曰據五吉等奏稱巴里坤牧放之馬

已揀選二千匹解送阿克蘇至買補缺額則現在

價值頗昂請於蒙古及商販等馬匹內酌量購辦

等語巴里坤馬價既昂而烏魯木齊伊犁所易哈

薩克馬匹甚多著傳諭五吉將巴里坤缺額馬匹
停其購辦仍咨行安泰阿桂等將來該處馬匹漸
多即送往巴里坤再多則送至內地以補營伍臺
站之缺額均為有益嗣後巴里坤惟購辦牛羊以
裕駐防屯田之需

命賞給來投之厄魯特等馬匹價值

上諭軍機大臣曰安泰等奏自哈薩克來投之厄魯
特阿玉什鄂奇勒等家口騎馱馬四十餘匹除量

行變價為伊等製備衣服外餘俱編入牧羣等語
伊等既苦哈薩克役使遠道來投所有編入牧羣
馬匹仍著給與價值以示體恤

命陞三等侍衛齊克慎為二等侍衛

上諭軍機大臣曰前因舒赫德接濟伊犁口糧妥協
交部議叙今據奏稱侍衛齊克慎在北路出兵多
年一切公務實心奮勉所有交辦阿克蘇事件皆
能領略妥協願停臣議叙將齊克慎陞用等語齊

克慎既効力多年前前經辦理進勦回部糧餉今又會同回部伯克等將續送屯田回人糧餉亦俱辦理妥協曾經兩次保題俱降旨於應陞之處開列著加恩授為二等待衛以示鼓勵

議闡展等處酌留屯田兵丁及籌辦承種餘田各事宜

御前侍衛副都統安泰等奏言闡展喀喇和卓托克三等處係新疆往來要路請留屯田兵六百名

仍量留供應差遣兵丁餘俱發往烏魯木齊陸續前往伊犁其空地畝賞給吐魯番公素賚瑞所屬分種所積糧石借給貧乏回人以為籽種俟秋收後還官照時價出糶歸入正項錢糧銷算奏入得

旨軍機大臣議奏尋議安泰所奏俱係酌照臣等原議辦理惟闡展等處屯田兵丁遷移後空地畝皆係官為開墾所留兵丁既不敷耕作應召

募回人承佃不便無故賞給回人請交與安泰
德爾格等查明空出地畝若干作何召募承佃
交納官糧之處再行詳議具奏奏入

上從之

庚申

命派員護送哈薩克使人等回本境游牧

上諭軍機大臣曰哈薩克使人入覲轉回應派員護
送納旺三濟扎卜對齊往返已及一載不必再令

前往著乾清門侍衛烏爾圖納遜帶領使人行至
烏里雅蘇台交成衮扎布等另派妥員送伊等過
烏梁海游牧抵其本境即行轉回

甲子

命喀爾喀貝子品級額爾克沙喇辦理伊犁牲畜
上諭軍機大臣曰解送伊犁牲畜已派額爾克沙喇
照管伊現在來京著准其馳驛前往

丙寅

諭陝甘總督楊應琚查辦解送孳生羊隻倒斃過多

情節

上諭軍機大臣曰據德爾格奏哈密送羊一千五百隻內例斃六百七十二隻解貢賠補僅及四分之一現在行文楊應琚永寧等語此項羊隻係牧放孳生非專候食用急需趨解者可比至哈密時既屆天寒草枯自應酌量於附近處所暫留牧放乃不俟春融即行起程在永寧等不過以羊隻一經

出境即與伊犁無涉殊非急公敬事之道至解員
所稱道遠不能飽飼以致倒斃亦係撫飾之詞著
傳諭楊應琚將解員張文學沿途照管實在情節
及作何著落賠補之處速查具奏并著永寧明白
回奏

戊辰

參贊大臣舒赫德疏奏添派伊犁防兵起程日

期

舒赫德奏言本年派出駐防伊犁健銳營前鋒
校一員驍騎校一員前鋒三十七名察哈爾總
管一員佐領一員兵八十九名厄魯特兵二十
四名効力之原任總管舍通額等四名共官兵
一百五十八名照例給馬二百五十匹駝四十
六隻鹽菜銀兩六個月口糧羊隻三個月每五
人給帳房一架并軍器等物又伊犁屯田都司
一員守備一員千總二員把總二員外委把總

二負兵四百名其鹽菜口糧等項與駐防兵同
因伊等將來造屋居住每十人先給帳房一架
其馱載口糧軍器籽種農具等項共給牛一百
九十六隻駝九十一隻兒騾馬五十七匹驕馬
一百九十五匹此次官兵及屯田回人俱辦理
已竣於正月初三日派副都統伊勒圖侍衛棟
保蘇魯克沁雅賽帶領自阿克蘇送往伊犁所
有撥往屯田回人戶口什物及護送起程之伯

克等職名謹列單恭呈

御覽奏入報

聞

己巳

命獎賞辦送伊犁屯田之伯克回人等

上諭軍機大臣曰上年舒赫德等辦理伊犁屯田回人起程朕於回部各城急公協助之伯克等特命分別賞賚其回人等蠲免常賦十分之一今續派

回人五百戶著傳諭舒赫德將急公協助之伯克
回人等俱照前例辦理

葉爾羌辦事都統新柱等疏奏徵收錢糧足數
公用情形

新柱等奏言臣等前奏葉爾羌等處徵收正項
及入官地畝錢糧是否足數公用俟本年辦竣
酌定今合計葉爾羌和闐大臣官兵等共二千
五百四十七人所需鹽菜銀四萬四千八百兩

有奇口糧等項一萬四千二百十七石二斗一
升有奇其葉爾羌徵收普爾錢文共三萬三千
六百騰格糧石二千八百帕特瑪又入官地畝
收租一千餘帕特瑪和闐徵收錢文除支用外
共九千零二十五騰格糧石一千五百帕特瑪
總計二城徵收錢文可作銀三萬零四百四十
六兩四錢二分八釐有奇放給鹽菜銀兩仍不
敷一萬四千三百五十五兩五錢七分一釐有

奇但二城糧石共五千八百帕特瑪有奇以一
帕特瑪準五石三斗共得三萬零七百四十石
除支給口糧外仍餘一萬六千五百二十二石
七斗九升酌照時價可補銀兩之缺此外仍有
餘存即為修造軍裝之用奏入報

聞

命嚴飭都統侍郎海明

軍機大臣奏言據海明奏稱舒赫德新柱額敏

和卓等請將阿爾虎之阿奇木伯克布魯特散
秩大臣阿奇木調授塔什密里克之阿奇木伯
克查布魯特阿奇木現在游牧頗遠不能兼管
令伊弟前往署理臣正在留心偵探至塔什密
里克等處並非要路惟阿爾虎自本年八月以
來布魯特吐魯番烏什貿易人等行走六次若
伊等所見果當又安敢以係臣所管妄生拘泥
祈

勅下新柱額敏和卓嗣後辦事可否與臣商確辦理
等語欽奉

諭旨交臣等察議查從前舒赫德咨商新柱以塔什
密里克等處與布魯特接壤而散秩大臣阿奇
木係布魯特人隨臣兆惠臣富德等實心効力
曾奉

恩諭俟有布魯特接壤之伯克缺出補授是舒赫德
等所奏原不因布魯特等往來行走之多寡也

今海明因現辦喀什噶爾事務而新柱等未經
咨商遂行陳奏未免分別彼此又有偵探阿奇
木之語似此無故猜疑更恐滋事但業經

聖明洞鑒命舒赫德暫往喀什噶爾辦事候永貴交
代海明調赴阿克蘇應請行文該辦事大臣等
嗣後惟計於公事有益不可稍分畛域奏入得
旨依議海明著嚴行申飭

庚午

諭參贊大臣舒赫德等酌籌賞給吐魯番回人地畝事宜

上諭軍機大臣曰德爾格奏稱托克三喀喇和卓等處空出地畝賞給吐魯番回人耕種已飭交素賚瑞等語近因安泰奏賞給餘田一事經軍機大臣議以此項地畝皆官為開墾未便無故賞給應召募附近回人承佃想寄信未到故德爾格照前辦理今應否向回人撤出及作何酌量辦理著傳諭

舒赫德令其查核具奏

二月乙亥

命定屯田官弁補授本處員缺之例

上諭軍機大臣曰楊應琚奏請以現在屯所之提標
左營守備馬得亨調補西寧鎮標中營守備所遺
員缺即以西寧鎮屬鎮海營千總趙印補授等語
已有旨允行矣西陲新疆初闢屯務方興現在屯
兵服勤率作殊可嘉許況於屯政尤所熟諳若遇

本處缺出即以補授在該員自必益加奮勉而公
事亦屬有裨嗣後遇缺需人應令管理屯務大臣
即於所轄人員內揀選陞用不必移咨該督另行
揀補其內地缺出在屯弁員作何與內地應陞人
員酌量分缺按次補用之處軍機大臣會同該部
詳議具奏

丁丑

命以開展等處餘糧協濟巴里坤

上諭軍機大臣曰據五吉等奏稱巴里坤支給官兵口糧由肅州等處運送殊多煩費請將闢展等處出糶糧石及烏魯木齊等處餘糧俱就近僱覓商人牲隻運送巴里坤以備支給等語所奏甚是年來官兵口糧由內地不時運送者亦因巴里坤等處無可接濟耳今屯田收穫既有盈餘即照五吉等所奏辦理仍傳諭闢展烏魯木齊辦事大臣於商駝回空之便酌量僱覓起運

己卯

諭參贊大臣阿桂等酌加屯田回人口糧事宜

上諭軍機大臣曰據定長等奏烏魯木齊屯田兵丁較常人所食頗多照例支給尚覺不敷等語已諭於常數之外每人日加米麪五合至伊犁屯田回人亦與綠旗兵丁同事耕作自當一體加恩著傳諭阿桂將伊等應否加給或一二年後視其効力如何再行辦理之處酌議具奏

諭烏魯木齊辦事副都統定長等查核屯田倒斃馬

匹

上諭軍機大臣曰定長等奏去年昌吉羅克倫等處
屯田兵三千五百名每二人給馬一匹因哈薩克
馬匹不習耕作倒斃將半復以三人給馬二匹為
額俟巴里坤解送牛驢至日仍將馬匹撥回牧羣
等語哈薩克馬匹除屯田外無他差遣就令驟難
服習亦何至倒斃如許恐有私宰情弊定長等並

未查核甚屬疎忽除馬匹額數照所奏補給外前
次倒斃馬匹仍行查核倘有別項情節即從重治
罪嗣後仍宜加意辦理毋致傷損

參贊大臣舒赫德疏奏分派回部各城侍衛官
員

舒赫德奏言軍機大臣等遵

旨將北路卡倫及看閱水草侍衛等減撤二十三員
其所得分例經領侍衛內大臣等揀選人員遣

往伊犁阿克蘇葉爾羌等處以備差遣除在途
病故二員外其達春等二十一人於正月初六
日抵阿克蘇臣擬派往伊犁六員阿克蘇六員
葉爾羌六員查喀什噶爾亦應派侍衛三員與
軍前年久侍衛等陸續更換奏入報

聞

癸未

諭參贊大臣阿桂酌賞遷移出境之哈薩克等

上諭軍機大臣曰據阿桂奏副都統伊柱報稱領兵
驅逐哈薩克人等所有附近布木察罕烏蘇勒卜
什等處游牧之哈薩克等俱已遵檄遷移現派侍
衛官負查勘額米勒齊爾塔爾巴噶台等處有無
哈薩克游牧相機辦理等語哈薩克等遵檄即行
遷移尚屬恭順宜酌加賞賚以示撫恤著傳諭阿
桂等將遵檄遷移之哈薩克等部落名目查詢存
記伊等有來伊犁貿易者即行曉示云爾等恭順

情形業經陳奏奉大皇帝恩旨嘉獎並加賞賚嗣後惟謹守本境不可踰越仍酌量賞給遣回

諭參贊大臣舒赫德等酌調烏魯木齊馬匹備用

上諭軍機大臣曰定長等奏烏魯木齊貿易得馬三千餘匹除留一千匹牧放外餘俱派永德解送伊犁並搜查朱爾都斯藏匿之嗎哈沁等語送馬二千餘匹事關緊要永德照看前往并搜捕逸賊所辦俱妥但伊犁現在貿易所得馬匹頗多而阿克

蘇葉爾羌喀什噶爾等處駐防亦需用馬匹著傳
諭舒赫德等查明各該處馬匹若尚需補足即行
文定長於預備伊犁馬內酌定數目調取定長即
選派官兵照管解送永德不必再行親往俱著傳
諭知之

都統侍郎海明疏奏喀什噶爾錢糧足用情形
海明奏言查舒赫德等前奏葉爾羌等城徵收
正項及入官地畝錢糧是否足數公用俟本年

辦竣酌定今合計乾隆二十五年七月起二十六年六月止喀什噶爾英噶薩爾二城大臣官兵通事臺站回人共二千二百餘人共需鹽菜銀三萬五千七百兩有奇糧石雜項一萬三千一百四十石有奇查二城正項徵收普爾錢文三萬六千四百騰格作銀二萬六千兩尚不敷銀九千七百兩有奇徵收正項糧石及入官地畝共糧二萬六千五百餘石除支給公用外餘

糧一萬二千三百六十石有奇合之徵收棉花
紅花共折價錢二萬八千九百二十騰格有奇
作銀二萬六百兩有奇扣抵不敷之項仍餘銀
一萬九百兩有奇是二城所出足敷公用且有
盈餘可以接濟別城謹將出入各細數列單恭
呈

御覽奏入報

聞

丁亥

議屯田人負陞轉事宜

軍機大臣會同兵部奏言臣等欽奉

諭旨酌議屯田人負陞轉事例查論俸推陞由兵部
通計內外人負具奏至題補保舉則係該督撫
辦理自應將內地營伍及屯田人負一體分缺
間用方為公當臣等酌議請交陝甘總督嗣後
遇有內地應行題補人負缺出務將在屯負弁

一體較其資俸淺深行走優劣酌定分數於本
內聲明備查其保舉人負亦宜秉公查辦庶勞
逸適均而陞轉有階自必更加奮勉於屯政尤
有裨益奏入

上從之

平定準噶爾方略續編卷九

欽定四庫全書

平定準噶爾方略續編卷十

乾隆二十六年二月乙酉

授原任按察使圖桑阿為同知原任副都統富昌為

三等侍衛

上諭軍機大臣曰原任按察使圖桑阿自派往葉爾
羌以來一切公事頗知奮勉著加恩賞給同知職
銜仍隨新柱辦事原任副都統富昌派往阿克蘇

照管牧羣解送牲畜俱屬奮勉今舒赫德又令其駐劄賽里木辦事著加恩授為三等侍衛

葉爾羌辦事都統新柱等疏奏查核沙爾呼勒
回人戶賦

新柱等奏言從前副將軍富德等收服沙爾呼勒伯克時查該處原管五百戶舊例每戶徵收黃金一錢後經霍集占等擾亂逃散僅存二百餘戶今漸次安集據伯克穆喇特稟稱情願照

舊按戶納金臣等隨行查核酌定二百戶上年
十二月交收黃金二十兩貯庫俟本年交收後
彙送京師嗣後戶口日增隨時查核辦理奏入
報

聞

丙戌

參贊大臣舒赫德疏奏酌籌流通庫貯餘錢

舒赫德奏言臣等同新柱海明額敏和貞等通

籌葉爾羌等城交官正項及入官地畝錢糧足
數公用尚有盈餘以錢折價可當銀一萬餘兩
但回城錢文不能如銀兩之到處流通且喀什
噶爾等城距阿克蘇頗遠難於運送若久貯庫
中恐於回人日用有礙查本年派往伊犁馬兵
三百名來年綠旗兵一千名俱由各城協助牲
隻今葉爾羌等城有庫貯餘錢應請酌購回人
及外藩貿易牲隻即外藩不收錢文亦可購買

布疋什物兌換倘牲隻一時不能足額又以餘錢為僱覓價值庶公務辦理裕如而曰人益安生業奏入報

聞

丁亥

恩卹厄魯特三等侍衛策伯克

上諭軍機大臣曰厄魯特三等侍衛策伯克前在軍營甚屬効力今隨永貴於中途病故深可憫惻著

賞治喪銀五十兩并查該員有無子嗣具奏請旨

壬辰

諭陝甘總督楊應琚嚴訊解送羊隻倒斃過多情節
上諭軍機大臣曰前據德爾格奏稱哈密解送羊隻
在途倒斃六百有餘當即傳諭楊應琚等令將千
總張文學沿途解送情節查明速奏今據永寧等
奏稱張文學自哈密起程由臺站行走四站後忽
由戈壁取道前往直至今年正月始到闢展等語

此項羊隻由哈密至闐展計程祇十一站何不可
行而必由戈壁且戈壁較臺站更近一日何以遲
至二月之久至前行四站僅斃三十隻後此六站
多至六百餘隻其中顯有盜賣情節張文學著革
職拏問交該督楊應琚嚴審具奏

癸巳

議更換臺站官兵事宜

參贊大臣舒赫德奏言穆素爾嶺有塔木噶塔

什噶克察哈爾海二臺較各臺差務繁劇所有
臺站官兵酌擬一年更換以應陞之缺陞用其
委署筆帖式於涼州莊浪駐防官兵內挑選綠
旗兵由陝甘各標營派出但現屆更換之期請
暫調阿克蘇滿洲綠旗兵前往來年更換官兵
應於班期前三月到臺學習行走其哈密至回
部各臺站官兵定為二年更換仍回該處操防
又各處駐劄大臣有字識差遣等兵丁亦請二

年一換照例於甘肅涼州等處選派於班期之前學習其換回各兵丁行文本處量加獎賞奏入得

旨軍機大臣議奏尋議軍營所設臺站酌量繁簡隨時增減移撤則更換之期未便定以年限如繁劇之地或一年或半年更換一次俱屬可行現在伊犁及回部各城滿洲綠旗兵丁甚多臺站差務乃伊等奮勉之路令其更換行走本屬近

便或有在軍前年久應行更換者亦可隨時奏
報將京師滿洲及陝甘綠旗兵再行選派以均
勞逸所有涼州莊浪滿兵及陝甘綠旗兵丁分
年派出之處應毋庸議其換回官兵議敘陞用
或量加獎賞等事應如所奏辦理奏入

上從之

甲午

命議處解送屯田壯隸之都司觀德等

上諭軍機大臣曰據伊勒圖等奏稱解送伊犁屯田馬牛駝隻令都司觀德守備王成學加意牧放乃所送五百四十九隻倒斃至二百有奇其餘亦多疲乏請將觀德王成學交部嚴加議處並將臣等一併議處仍著落賠補等語損傷牲隻過多乃該解員等牧放水草不得其宜之所致與伊勒圖等無涉至阿桂據觀德等所報即撥給馬匹接濟更屬辦理妥協著將觀德王成學交部嚴加議處餘

俱不必處分

議肅州回人移歸吐魯番事宜

陝甘總督楊應琚奏言肅州威魯堡安插吐魯
番回人現有二百五十戶一千五十餘名口承
種熟地一萬五千三百六十餘畝戶口日增地
畝有限伊等聞瓜州回人遷回故土其年老者
亦有思歸之意臣前晤額敏和卓亦云願接濟
口糧帶回安插擬即於本年秋收後令該千戶

珈如拉等帶領仍委員照看起程送至哈密并
先期知會吐魯番公素賚瑞前來接濟其所遺
地畝招募承種於內地民生亦有裨益奏入得
旨軍機大臣議奏尋議肅州所住回人自雍正四年
內附蒙

世宗憲皇帝賞給安插不徵賦稅至乾隆二年生齒日
繁又蒙

皇上恩賞可耕荒地減半給與籽種農具但所有戶

口較初附時已增一倍自當籌畫久遠今西域
蕩平吐魯番已成樂土且可耕之地尚多應照
瓜州回人例准其遷回故里但所奏知會額敏
和卓之子素賚瑞之處臣等愚見該千戶玠如
拉之祖托克托瑪木特與額敏和卓俱被準夷
凌虐先後來歸今既遷回應請交與該督等酌
量附近闢展之吐魯番可以耕牧之地於今年
秋收後遷往並即於千戶玠如拉百戶額明和

卓二人內揀選一員授為伯克以一員副之其
將來賦稅即由闡展大臣徵收至沿途照料無
令失所請交與該督妥協辦理奏入

上從之

三月庚子朔

命定免死減等人犯改發巴里坤之例

上諭大學士曰前因甘省軍務未竣且歲事尚屬歉
收因將免死減等發往巴里坤安插人犯暫行停

止以免兵役押解及沿途口食之繁今大功告成
年穀時熟屯田收穫亦為充裕自應仍照前例改
發俾投諸遠方者得以力耕自給而內地匪類亦
知所懲創不致漸染居民此舉實為兩得惟從前
所定條例為數稍多著軍機大臣會同刑部堂官
詳覈各犯案情酌量刪減著為定例奏請通行

辛丑

命拏獲巴里坤逃犯即於各該處正法

上諭大學士曰據明德奏稱嗣後巴里坤逃犯請即
於拏獲地方審明正法不必遠解甘省等語所見
甚是前於直隸督臣拏獲逃犯一案諭令就本處
正法而各省辦理尚未盡一此等匪徒原屬去死
一間之人乃復悍然脫逃愍不畏死即解至甘省
亦法無可逭而長途押解易致疎虞且徒滋兵役
往來之煩嗣後凡有發遣巴里坤等處逃犯經原
籍及所過省分盤獲者一經移詢明確即由各該

督撫自行奏聞於拏獲處正法示衆以省弊累

都統侍郎海明疏奏希卜察克布魯特懇求安

插

海明奏言二月十五日據駐卡人員報稱居住

阿賚之希卜察克布魯特額穆爾比遣人呈稱

前隨侍衛托倫泰同波羅泥都等攻取葉爾羌

後聞波羅泥都欲相殺害因率四百餘戶逃往

安集延續知大兵平定回部願率所部來歸適

與伯克額爾德尼有貿易之約遣弟阿璘前往
忽為所拘今決意歸誠懇請指地游牧等語臣
准其代奏并賞給來使羊隻口糧仍詢公噶岱
默特散秩大臣阿奇木俱言情節屬實謹擬將
來使穆魯特與輪班入

覲之伯克等同行奏入報

聞

癸卯

授厄魯特侍衛碩通為頭等侍衛

上諭軍機大臣曰阿桂奏稱遵旨傳諭厄魯特侍衛碩通來京挈眷於伊犁居住據稟情願垂時効力俟將來再行挈眷等語碩通在軍前宣力有年不以挈眷為急甚屬可嘉著加恩授為頭等侍衛仍聽其隨便來京

甲辰

諭陝甘總督楊應琚據實查訊解員傷損羊隻情節

上諭軍機大臣曰楊應琚查奏千總張文學等倒斃
羊隻情節著落不行留牧之永寧淑寶等賠補殊
未允協前據永寧查奏該員改道戈壁行走以致
羊隻倒斃過多業經傳諭該督令其嚴行查辦計
具奏時尚未奉到但自哈密至闐展不過十一站
若云戈壁並無水草則從前四萬餘隻何以長途
無損且四萬隻既經前往未起千餘隻自應隨行
永寧等不令留牧未為不是今以做員不能賠補

而加罪於永寧等則所見小而大不公朕辦理軍務豈專為錢糧起見楊應琚何未之知著傳諭該督再行秉公查訊據實具奏

丙午

諭參贊大臣舒赫德等辦理安插回人事宜

上諭軍機大臣曰從前辦理回人莽噶里克後因伊屬人無所統束暫令安插吐魯番交額敏和卓管理今大功告成回部皆朕臣僕自應各率其屬不

相兼并朕意將此項回人內擇其賢能者授為伯克等職仍安插原處查明舊日賦役照例供辦又阿里衮前因追賊至羅卜淖爾所收回人亦應照此辦理著傳諭舒赫德即與額敏和卓商酌具奏請旨

丁未

葉爾羌辦事都統新柱疏奏辦理查勘引水溉田事宜

新柱奏言臣等看得葉爾羌形勢毗連戈壁雨水亦少全賴引水溉田是以設有密喇卜伯克專司其事查回部舊例凡怠於灌溉及紊亂成規者俱有罰項以充公費無庸另給惟引水時須派撥丁役從葉爾羌河源逐次查勘行二日至愛濟特呼其密沙爾等七處俱須於一日內分道行走現任密喇卜伯克邁達雅爾係和闐人未曾隨帶丁役懇照噶雜納齊商伯克之例

給與丁役五十人承辦公事臣等詢之阿奇木
伊沙噶等伯克俱稱需用屬實即飭令照例辦
理奏入報

聞

戊申

諭定邊左副將軍成袞扎布等展拓喀爾喀等處卡
倫

上諭軍機大臣曰成袞扎布等奏從前準噶爾未平

喀爾喀等卡倫皆向阿爾台山梁安設今準夷回
部俱入版圖向時戍守之區俱成內地實為亘古
所無請將扎哈沁烏梁海喀爾喀等卡倫展拓庶
耕牧有資等語展拓卡倫於伊犁生計有益所奏
阿爾台卡倫以外指定耕牧處所著准其辦理可
傳諭伊犁烏魯木齊巴里坤等處大臣與成衮扎
布等將彼此作何聯接安設卡倫之處會商妥辦
具奏

諭北路解送牲隻暫停補額各事宜

上諭軍機大臣曰成衮扎布等奏遵旨解送伊犁駝
一千隻牛三千隻羊三萬隻業已編羣分起所派
都爾伯特扎哈沁人等於行糧外各賞銀五兩其
派出官兵俱支給一歲錢糧現在烏里雅蘇台軍
營尚餘駝六百隻羊四千餘隻牛二百餘隻請將
缺額羊隻仍於春來由牧羣送補外餘俱暫為停
止俟需用時再行支給等語成衮扎布等辦理伊

犂牲隻甚屬妥速今烏里雅蘇台牲隻既尚足用
除羊隻外俱著暫停補額併傳諭已爾品知之

已酉

命副都統伊勒圖協辦喀什噶爾事務

上諭軍機大臣曰舒赫德奏稱喀什噶爾地頗衝繁
若駐劄辦事大臣二員較為有益今伊勒圖在阿
克蘇尚無承辦要務可否令往喀什噶爾協同永
貴辦事如蒙俞允其所管健銳營兵丁令侍衛揚

桑阿管理又侍衛訥齊訥應於秋季回京所管索
倫兵丁令換班侍衛額爾登額管理等語阿克蘇
既有和其衷協同海明辦事伊勒圖即著前往喀
什噶爾餘俱照所奏行

庚戌

諭哈密辦事布政使永寧等酌募造房工作事宜

上諭軍機大臣曰永寧奏准劉順咨調哈密兵丁四
百名往巴里坤建造房屋其哈密房屋俟來年安

西兵到時再行建造等語哈密房屋與其守候安
西兵丁不若招募回人俾赴工作則官房既得速
成而伊等生計亦有裨益著傳諭永寧等須與玉
素富商酌是否可行亦不必勉強從事

命賞英噶薩爾阿奇木伯克素勒坦和卓三品頂帶
上諭軍機大臣曰素勒坦和卓前因富德等令往拔
達克山甚屬奮勉已加恩賞給四品頂帶雀翎授
為阿奇木伯克此次隨明仁額爾登額等奉使外

藩又著勞績著加恩賞給三品頂帶以示獎勵

甲寅

命以波羅泥都幼子薩木薩克送京養育仍訪察其餘藏匿子嗣

上諭軍機大臣曰海明奏稱查出波羅泥都離異之妾愛什阿哈察所生子薩木薩克將伊乳母及收養之回人博羅特索丕解京等語薩木薩克尚屬童稚不應緣坐送來京師惟加恩養育可耳即博

欽定四庫全書

平定準噶爾方略續編

卷十

十六

羅特索石留養舊主之子情亦可矜具著照例安插但聞波羅泥都尚有二子或藏匿回地亦未可定著傳諭永貴等以留養薩木薩克一事曉示回衆仍留心訪察其餘子嗣毋任藏匿

議運闢展餘糧至巴里坤應用事宜

駐劄闢展郎中德爾格奏言准軍機處議闢展喀喇和卓托克三共貯糧二萬五千石計歲需不過四千石其餘一時難於出糶應運至巴里

坤接濟兵丁口糧查闕展催覓回空商駝若照肅州哈密解糧之例每一石行走百里給銀四錢九分八釐有奇自闕展至巴里坤七百七十里每石共需運費三兩八錢三分七釐有奇較內地運送似為省便奏入得

旨軍機大臣速議具奏尋議從前由肅州哈密至巴里坤所運糧石以官價運費合算約十有餘兩今以闕展糧運計之所費不過三分之一自應

如此辦理請行文德爾格照臣等原議將歲需之數約存三年以內餘俱運送巴里坤其運費於兵餉內動用奏入

上從之

諭陝甘總督楊應琚酌籌撥運新疆糧石事宜

上諭軍機大臣曰德爾格奏闢展餘糧運送巴里坤一事已定議准行矣因思哈密安西等處俱有官兵所需口糧多由肅州等處運送著傳諭楊應琚

查明內地運至哈密等處每石約需運費若干若
照關展運送巴里坤之例由吐魯番一路送來哈
密安西每石約需運費若干如較內地運往之費
大有節省固不待言即令所費相等而內地多留
一石之糧即間間受一石之惠其為利更溥也即
著詳籌妥議具奏

命陞賞照管接濟馬匹之侍衛官兵等

上諭軍機大臣曰阿桂等奏由阿克蘇派往伊犁之

綠旗兵丁撥馬三百匹接濟令三等侍衛鄂鐸索
倫驍騎校署參領伊爾第領兵三十五名前往照
管以迄回營無一傷損等語鄂鐸等此次行走甚
屬可嘉鄂鐸著加恩陞授二等侍衛伊爾等著交
部議敘兵丁等酌量獎賞

叅贊大臣舒赫德等疏奏酌議移駐闡展等處兵丁
舒赫德等奏言查軍機處議奏闡展等處裁汰
兵丁請陸續撥往伊犁屯田其各該處仍應留

兵若干俱行文舒赫德阿桂定長安泰等會商
具奏臣等查伊犁所派綠旗兵已足二千名今
秋遷移回人二百戶亦足一千戶之數惟額林
哈畢爾噶為伊犁要路現在闢展等處裁汰兵
丁俱送烏魯木齊請於本年秋收時臣安泰定
長酌量馬匹牲畜派兵一千名於瑪納斯揚巴
勒噶遜安集哈雅晶河等處酌量駐兵屯田則
地當伊犁烏魯木齊之中聲勢聯絡接濟臺站

亦便至闡展等處應留官兵一事查闡展自大
功告成無承辦軍需之事留兵六百名已足惟
哈喇沙爾為闡展阿克蘇適中之地又與朱爾
都斯之空閒游牧相近有多倫回人游牧請駐
兵八百名將現有官兵七百名內汰其老弱廢
疾以闡展餘兵補額其今秋應派伊犁馬兵綠
旗兵及葉爾羌等處駐兵額數臣舒赫德仍會
同各駐劄大臣等議奏奏入

上從之

御前侍衛烏魯木齊辦事副都統安泰疏奏辦送屯田官兵行抵伊犁日期

安泰奏言正月初三日准阿桂咨伊犁屯田由烏魯木齊調取辦餉知縣一員縣丞一員又屯田馬一千匹及籽種口糧農具貿易緞疋鹽菜銀兩令金梁帶領於本月二十六日至鄂伯勒齊爾因尼楚滾登努勒台等處雪大另從博羅

布爾噶蘇嶺一路修鑿冰雪阿桂復遣侍衛鐵
柱接濟協助已於二月初七日行抵伊犁計馬
一千匹又厄魯特七十餘口騎馬一百餘匹駝
一千餘隻及馱運各項俱交金梁收訖臣於十
六日起程回烏魯木齊奏入報

聞

乙卯

命議敘

御前侍衛副都統安泰等協濟屯田勞績并免總兵
官金梁疎防處分

上諭軍機大臣曰安泰奏辦送屯田官兵馬駝糧餉
器具全抵伊犁等語此次辦理妥協甚屬可嘉著
將安泰金梁及隨同送馬官員等俱交部議敘兵
丁賞給一月鹽菜銀兩其金梁所領綠旗兵內逃
走三人既即時查報著加恩免其議處脫逃兵丁
嚴緝務獲

諭按察使約世通約束多倫回人事宜

上諭軍機大臣曰據納世通奏稱派往伊犁屯田之多倫回人等因玉古爾至穆素爾嶺地多戈壁牲畜疲乏將籽種口糧借供飼秣旋准和其衷咨已向阿克蘇回人通融辦解今准阿桂咨仍少籽種三十五石暫將口糧內大麥抵補再行辦送等語納世通初次辦理殊未妥協至多倫回人係甫經招撫安插庫爾勒非各城回衆之馴服者可比嗣

後宜留心約束固不當苦累亦不得過於姑息著
傳諭知之

己未

諭陝甘總督楊應琚籌議臺站糧運事宜

上諭軍機大臣曰楊應琚請撤南路臺站改歸北路
安設一摺所奏哈密不必駐劄官兵等語甚屬非
是軍機大臣遽照覆定議亦於事理未協前南路
安臺特為承辦軍需此時改歸北路原屬可行至

欲將哈密各項事宜歸巴里坤大臣承辦而開展
一帶屯務交烏魯木齊大臣稽查無庸再駐官兵
則所見甚屬紕繆哈密為新附各回部總匯之地
將來拔達克山布魯特等回人往來貿易仍當時
派大臣辦理或官兵太多酌量裁撤則可若盡歸
巴里坤承辦無論鞭長莫及且將來經理之負勢
必由督撫等派委武則副將文則道員此等不諳
外藩情事中朝政體非辦理張皇即因循推諉有

不蹈準噶爾貿易之轍而損威失馭者乎楊應琚
向知任事何並不計及或因永寧等在彼辦事未
免掣肘因為此奏則國家要務將委諸不能任事
之有司封疆大吏似此心存畛域豈朕委任重寄
之意若永寧果有徇私舞弊之處何妨直叅其人
不必撤其任也至請停運關展等處餘糧一事所
引僅屬安西綠旗兵折價更未可視為成例此項
糧運乃為哈密巴里坤等處辦事官兵俸餉及將

來接濟之計若果可與駐防綠旗一例辦理朕豈
轉不樂從而必斤斤預籌輓運乎該督祇援折色
二兩二錢之例絜長較短所謂不揣其本而齊其
末矣所有該處辦事一切官兵等現在作何支放
及所存糧七萬石實足供支幾年儻有不敷作何
接濟俾將來不致再籌糧運之處奏內並未通盤
籌畫著傳諭楊應琚令其悉心確核妥議具奏

庚申

按察使納世通疏奏多倫回人控告總管情節
納世通奏言上年十月初二日玉古爾多倫回
人將總管阿奇木伯克阿木都賚勒索伊等緞
疋牲隻列款呈告因阿卜都賚前往伊犁未回
臣與庫車大臣等會商俟該伯克回日派員押
送並率同吐魯番公素賚瑞審訊具奏此時先
令素賚瑞署理玉古爾等處阿奇木事務奏入
報

聞

辛酉

諭直省督撫將軍及巴里坤等處辦事大臣等經理
新疆發遣人犯事宜

上諭軍機大臣曰軍機大臣會同刑部核定發遣巴
里坤人犯條例奏請通行已降旨依議此等罪犯
本屬去死一間投畀遠方既不至漸染民俗而新
疆屯墾方興又可力耕自給實為一舉兩得前降

諭旨甚明但各省督撫亦當經理盡善如每次起解人數太多僉差既恐紛繁且沿途食宿壅積均屬未協應酌量人數或十餘名至二十名內外分作一起節次遞送始為合宜至甘省乃遣犯會集之地而各省解犯必取道西安該撫等於人犯解到時尤宜酌其多寡緩急與甘撫彼此知會該督又為統轄照應至既抵遣所該處辦事大臣更當嚴加約束俾勤於耕作毋致游手生事則良法不

滋流弊方可謂之實力奉行著傳諭各省督撫將
軍駐劄巴里坤烏魯木齊闢展等處辦事大臣知
之

乙丑

命伊犁等處換班駐防滿兵應支各項照進剿例酌
減賞給

上諭軍機大臣曰如松奏綏遠城挑選烏里雅蘇台
換班滿兵五十名俱照派往軍前之例支給馬駝

鹽菜等項銀兩等語所辦未免過當伊等不過駐防更換非進剿可比應酌量賞給嗣後派往伊犁葉爾羌等處駐防兵丁將應給各項照進剿兵丁酌減賞給

丙寅

命停止內地辦送伊犁牲隻

上諭軍機大臣曰阿桂奏稱內地購辦牛驢較之哈薩克馬價一牛可值馬四匹一驢可值馬二匹現

在伊犁烏魯木齊貿易馬匹既多且耕作原屬可用請將內地購辦牛驢之處停止等語從前伊犁經畫伊始故從內地辦送牲畜今貿易馬匹甚多自當酌量辦理著傳諭楊應琚永寧五吉等除現在購辦牲畜仍即解送外嗣後陝甘哈密巴里坤等處不必購辦伊犁牲畜

丁卯

授阿桂為內大臣

上諭軍機大臣曰阿桂奏稱伊犁烏魯木齊貿易哈薩克馬匹漸多准舒赫德咨取馬二千匹與其從巴里坤解送不如在伊犁所得馬匹內除屯田足用外挑選一千匹送往阿克蘇其餘從烏魯木齊辦送至伊犁所換哈薩克騾馬一二年間即成大羣請將巴里坤等處馬匹仍於本地牧放等語阿桂籌辦馬匹甚屬妥協俱著照所奏辦理仍加恩授為內大臣嗣後宜益加奮勉以副優眷

命優卹副都統端濟布


上諭大學士曰端濟布前在軍營頗屬効力今患病
溘逝著加恩特贈都統職銜賞治喪銀五百兩應
得卹典著該部察例具奏又

諭曰端濟布因軍前得傷回京病故雖與陣亡官負
有間念其久在戎行身嬰鋒鏑殊可軫惻著加恩
准照陣亡例入祀昭忠祠以示優卹

戊辰

諭參贊大臣舒赫德等辦理希卜察克布魯特事宜
上諭軍機大臣曰前據海明奏希卜察克布魯特額
穆爾比願率所部內遷令伊弟穆魯特貢獻土物
并據稟稱伊弟阿瑞為額爾德尼伯克所拘等語
額穆爾比誠心向化甚屬可嘉著加恩賞給三品
頂帶仍賞緞二疋額穆爾比既與布魯特阿奇木
同族即一處安插亦可伊弟穆魯特著於回部伯
克入覲之便來京現在穆魯特若求向霍罕索取

伊弟即告以前此之事皆爾等素不和睦所致且
在歸附以前不便代索俱著傳諭舒赫德知之



平定準噶爾方略續編卷十

欽定四庫全書

史部

平定準噶爾方略續編卷十一至
三

詳校官監察御史_臣孫家賢

通政使司副使_臣莫瞻菴覆勘

總校官進士_臣朱鈐

校對官修撰_臣戴衢亨

謄錄監生_臣蔣知廉

欽定四庫全書

平定回疆方略續編卷十一

乾隆二十六年夏四月戊寅

諭參贊大臣舒赫德等酌增伊犁屯田回人事宜

上諭軍機大臣曰阿桂奏稱葉爾羌喀什噶爾阿克

蘇烏什等城有舊在伊犁耕種回人二三千名今

聞開設屯田願來効力者甚多若添駐回人即可

裁減綠旗兵丁但該伯克等或以錢糧缺額為詞

惟停止協助之費并照派出回人戶口減其糧額
則衆皆樂從等語所奏甚是伊犁再增回人千餘
生齒更覺繁盛亦于伊等生計有益且裁減綠旗
兵丁既省內地之力而回人田作亦較勝綠旗兵
可將阿桂奏摺錄寄舒赫德等閱看定議具奏
命獎賞哈密貝勒玉素富等

上諭軍機大臣曰永寧等奏稱遵旨將安插移往塔
勒納沁屯田兵丁添蓋房間僱覓回人工作傳諭

玉素富據稱情願派伊所屬供役不敢領受工價
等語玉素富年來甚屬奮勉此次急公趨事尤見
悃誠深可嘉尚著加恩賞大緞四端荷包一對
小荷包二對至修造兵房回人即不領公價亦當
加給口糧著永寧等從優酌辦

已卯

命賞原任巡撫阿思哈三品頂帶往烏魯木齊辦事

命更換西路辦事大員

上諭軍機大臣曰西路駐劄大員有辦事數年者應
行更換著伊勒圖更換伊桂旌額理更換安泰阿
思哈更換定長溫敏更換五吉鄂寶更換書山達
桑阿更換納世通伊犁既有阿桂豐納亨伊勒圖
至日伊桂即行來京安泰定長五吉書山納世通
各有承辦事務著俟派往大員接辦一月交代明
白後再行起程

議瑪納斯等處屯田安臺事宜

御前侍衛副都統安泰等奏言臣等酌議瑪納斯庫爾喀喇烏蘇晶河等處在伊犁烏魯木齊之間地可屯田應設立村堡三處以次經理來春先派兵五百名往瑪納斯以一百名起蓋倉廩房舍四百名屯田續派兵五百名往庫爾喀喇烏蘇即以瑪納斯餘糧辦給其晶河亦照此續辦再由烏魯木齊至伊犁道遠地廣若安設臺站以馬兵五百名往來巡查則外藩貿易人等觀

瞻既肅於牲隻亦有裨益查烏魯木齊有索倫兵三百名來春辦理瑪納斯屯田時請先派索倫兵五十名同往分卡巡查奏入得

旨軍機大臣議奏尋議本年三月舒赫德奏請派綠旗兵一千名於羅克倫以外瑪納斯等三處屯田今安泰等所奏相符應將派兵撥餉給與籽種農具等項令其通融酌辦再安泰等前有自伊犁至烏魯木齊安設二十四臺站之奏臣等

因伊犁駐兵屯田事宜俱在阿克蘇辦理議未
准行今瑪納斯等處既開設屯田則所奏現有
索倫兵三百名應如何添派合為馬兵五百名
往來巡查其安臺處所每臺用滿洲馬兵綠旗
兵若干辦給馬匹牲隻俱交安泰等會同阿桂
永貴酌辦奏入

上從之

辛巳

命領隊大臣副都統公豐安往伊犁効力

上諭軍機大臣曰舒赫德等奏稱禁爾羌領隊大臣
公豐安因有派往伊犁馬兵三百四十名懇請帶
往効力若蒙俞允現在喀什噶爾有護軍統領德
爾素富虎俱係副都統職銜請簡一員領隊其派
往伊犁綠旗兵一千名請照阿桂咨調交副將國
柱帶領等語豐安既願在伊犁効力著照所請前
往禁爾羌領隊員缺著德爾素調補其派赴伊犁

綠旗兵亦准令國柱帶領約束前往

命以官墾餘田賞給吐魯番回人

上諭軍機大臣曰舒赫德奏稱吐魯番回人向無租賦自安西移駐以來借官穀一千石為籽種每年交穀四千石因與官兵分種故穀石未能足額今官兵既經遷移請將吐魯番展闢等處屯田酌足留兵之用其餘賞給回人令將穀石照數交納等語昨據德爾格奏將此項地畝賞給回人未將從

前曾借官穀之處聲明朕以闢展等處屯田係官
為開墾不便無故賞給著舒赫德查辦今既查有
應交穀石著加恩將闢展托克三喀喇和卓等處
遷移兵丁閒曠地畝除酌留足用外餘俱賞給吐
魯番回人耕種其數年來所缺官穀理應照數補
還但恐有妨伊等生計亦著加恩豁免仍宣諭回
人嗣後官穀四千石務宜如數交納不可以前虧
缺俱著傳諭知之

申諭叅贊大臣舒赫德等安插布魯特額穆爾比事
宜

上諭軍機大臣曰舒赫德奏稱希克察克布魯特額
穆爾比從霍罕來投恐霍罕額爾德尼伯克有使
人前來如但索伊所給額穆爾比回人即查出給
還若額穆爾比在霍罕有為匪情事又經來文叙
及似未便安插辦理等語前據海明奏額穆爾比
遣使歸誠朕即降旨嘉獎賞給頂翎令與散秩大

臣阿奇木一處游牧以伊並非霍罕屬人不過因回部擾亂暫時依倚今西域蕩平俱為臣僕其在霍罕與來喀什噶爾相同額爾德尼伯克果遣人索取即當以此曉示舒赫德所奏其意蓋不欲如此辦理在準噶爾未亡時尚可藉口今視霍罕亦如準噶爾乎此特漢人恐啟邊釁之習氣由今觀之有何邊釁之可啟耶著傳諭舒赫德等仍遵前旨將額穆爾比令與阿奇木一處游牧所領回人

內果有霍罕所屬自當查核發還但不可聽一面之辭即行給付若額爾德尼伯克遣使索取額穆爾比則諭以額爾德尼伯克與額穆爾比俱屬輸誠內附並無分別如額爾德尼伯克欲投來內地亦即加恩安插俱著遵照辦理

癸未

諭陝甘總督楊應琚籌酌糧運事宜

上諭軍機大臣曰楊應琚奏哈密巴里坤二處尚存

糧七萬餘石可敷二千官兵暨過往員役六七年
供支此外附近哈密屯田歲收糧數千石又可接
濟至安西官兵向來止撥本色數百石現在各該
縣倉糧充裕有備等語前諭該督等籌運糧石原
為哈密巴里坤等處官兵接濟之計今既稱充裕
即停運闢展等處餘糧亦無不可而該督復有嗣
後各回部往來貿易寧使多為運貯之語又未免
因前降諭旨意存遷就朕辦理庶務惟以隨事制

宜用歸實際為要初不拘執成見如果內地需糧接濟即當輓運屯田餘積若本不需用而必強符前說致糜運費又何如即留之本處不必官為經理之尤得乎楊應琚所奏安西折價一摺現今軍機大臣議奏此摺所奏亦未甚明晰著一併傳諭該督知之

甲申

定効力贖罪大臣歲支養廉之例

上諭軍機大臣曰西路辦事大臣議給養廉原俾伊等公私寬裕至獲罪發往効力人員並無支給之例但伊等既駐劄辦事仍帶大臣品級著加恩將所定養廉等項減半支給此次鄂寶阿思哈應得各項即遵照辦理著為令

議派回部各城官兵移駐伊犁事宜

參贊大臣舒赫德等奏言臣等欽奉

諭旨酌將葉爾羌等城官兵移駐伊犁本年已派阿

克蘇等處馬兵一百五十名綠旗兵四百名前
往俟麥收後將葉爾羌等城馬兵移駐三百四
十名以足一千五百之額來年再于各城選派
綠旗兵一千名前往其各城仍應留兵以資防
守查葉爾羌馬兵六百八十七名酌派官四員
兵一百八十名喀什噶爾兵五百名酌派官二
員兵一百名英噶薩爾兵一百六十名酌派官
一員兵六十名通計派出滿洲兵四十名索倫

兵一百名察哈爾兵二百名前往伊犁其阿克
蘇馬兵三百名厄魯特兵四十三名僅足差遣
毋庸派撥又查綠旗兵丁葉爾羌九百四十名
喀什噶爾八百四十一名俱酌留六百名英噶
薩爾三百八十六名和闐三百名俱酌留二百
名餘兵八百六十七名尚不足兵一百三十三
名酌將烏什兵二百五十名派出一百名庫車
兵三百名派出三十三名發往伊犁其阿克蘇

綠旗兵六百餘名賽里木拜一百五十餘名毋庸派撥其馬兵騎馱牲隻之例官給馬三匹駝一隻兩兵合給馬三匹三兵合給駝一隻至葉爾羌等處補額馬匹請將巴里坤送馬二千匹調撥一千匹前往又續調之綠旗兵所需軍裝馱載請于各城餘糧內購辦并雇覓協濟其行糧既有臺站預備仍酌給羊隻自可不需裹帶奏入得

旨軍機大臣議奏尋議葉爾羌等城回人自歸附以來尚屬守分安生無需多兵駐劄應就近調往伊犁今舒赫德欽遵

諭旨酌量抽調所有撥給馬駝調取補額馬匹等事俱應如所奏辦理惟原議調往綠旗兵一千名近據阿桂奏請若多調回人一千即可減綠旗兵之額現交舒赫德等酌議仍俟議奏到日請旨奏入

上從之

丙戌

諭陝甘總督楊應琚確核應賠倒斃羊隻

上諭軍機大臣曰據永寧等查奏千總張文學等解送羊隻倒斃情由一摺前據楊應琚奏稱此項倒斃羊隻因永寧淑寶未曾截留牧放應著落賠補朕即謂所送羊隻四萬俱已前行僅剩千餘隻即不令留牧亦未為過今據查奏張文學等不知道

路將羊驅往鹹池牧放以致生癩倒斃則理應著
落解員賠補伊等俱係楊應琚等派出之員當令
何人賠補作何治罪之處著楊應琚核明定議具
奏

戊子

諭叅贊大臣舒赫德等酌籌撥用各城餘糧事宜

上諭軍機大臣曰據書山等奏庫車沙雅爾每年交
納官糧及官借籽種所收糧數共三千一百四十

餘石除支給官兵口糧飼秣臺站馬駝外尚餘一
千餘石以備接濟往來官兵之用等語庫車既有
餘糧諒各城亦自不少雖有往來官兵亦未必需
用如許與其存貯虛耗或酌量減價折給官兵鹽
菜銀兩既于伊等日用有益而官糧亦不致陳積
朕意伊犁回部各駐劄大臣俱當照此辦理若該
處情形不便亦即據實陳奏著傳諭舒赫德通籌
各處情形是否可行酌議具奏

庚寅

申諭陝甘總督楊應琚再籌闢展糧運事宜

上諭軍機大臣曰楊應琚請停運闢展等處餘糧一事並未計及哈密巴里坤等處官兵口食及將來接濟之法僅援引安西駐防一處折價運費較短絮長辦理全未中窾軍機大臣已經議駁今又據納世通奏哈喇沙爾一年收獲米穀九千餘石除支用外可餘四千餘石請照烏魯木齊例催覓回

空商駝運送巴里坤等語是裒屯田之糧節內地之費實為一舉兩得而楊應琚所奏則授綠旗兵折價二兩二錢之例欲議概行停運試問哈密等處辦事大臣官兵豈可盡照綠旗兵例專給折色乎將來安西官兵移駐巴里坤若從內地裹帶前往此二兩二錢之數是否半本半折扣係全給折價并合之借給購辦孳生牲隻每石合價若干且向據地方官奏報糧價肅州安西等處每石不下

五六兩有奇今折給之數不及三之一此數年來官兵等但恃此不足糴食之折價亦豈能支此處朕殊不解且與其令伊等向內地糴買拮据何若就便於闢展等處轉運之為得乎楊應琚所奏全未明晰著再行傳諭令其詳悉確核具奏

辛卯

議鑄給新疆印記事宜

叅贊大臣舒赫德等奏言回部新定辦理一切

事務文移俱宜鈐用印記查阿克蘇葉爾羌喀
什噶爾業蒙

賞給欽差大臣關防其闢展哈喇沙爾庫車烏什和
闐英噶薩爾六處請交該部鑄給印記以昭體
制而杜弊端奏入得

旨軍機大臣議奏尋議鑄給印記用昭信守實為新
疆要務臣等近奉

諭旨鑄給新疆駐劄大臣印信用清漢篆文及回字

謹酌議鑄給辦理伊犁等處事務大臣之印一
顆其烏魯木齊葉爾羌喀什噶爾阿克蘇同辦
理關展等處事務圖記一顆其哈喇沙爾庫車
烏什和闐英噶薩爾同共計印五顆圖記六顆
所有印信圖記大小分數交該部照例酌辦俟
鑄成給發後將現在所用關防因便恭繳如各
城有自刻鈐記俱行銷毀謹擬寫各印記三樣
字體恭呈

御覽奏入

上從之

壬辰

諭闕展辦事郎中德爾格停運屯田餘糧

上諭軍機大臣曰據德爾格奏僱覓回空商駝運送
米麩六百餘石至巴里坤等語前因德爾格籌運
闕展餘糧經軍機大臣議比較肅州運費節省三
分之二是以行文交辦嗣據楊應琚奏哈密巴里

金史四庫全書
卷十一
坤糧石充裕又經行文停止著傳諭德爾格嗣後
不必運送遵照續降諭旨減價扣抵官兵鹽菜銀
兩其或不便亦即據實具奏

諭參贊大臣阿桂等辦理伊犁回人事宜

上諭軍機大臣曰據阿桂奏護送伊犁屯田回人之
阿克蘇回人頗拉特等事竣後行至濟爾哈朗河
脫逃已行文嚴緝但準噶爾舊例伊犁逃出回人
嚴拏治罪回人逃來伊犁即行安插若頗拉特係

仍至伊犁可否照舊辦理等語伊犁既向有此例著照前辦理但此內有從回地犯罪逃來伊犁者仍當究明嚴懲不可姑息容留并傳諭舒赫德等知之

乙未

叅贊大臣舒赫德疏奏葉爾羌等城應辦事宜
舒赫德奏言葉爾羌喀什噶爾為回部大城外
藩要路兩城之間有英噶薩爾城距拔達克山

隘口甚近布魯特散秩大臣阿奇木及阿奇木
伯克素勒坦和卓俱能熟悉外藩情形其葉爾
羌所屬沙爾呼勒附近之布魯特等俱係阿奇
木舊管兩城聲息相通不可自分畛域尋常該
管事宜猶可自行辦理再為知會其關係外藩
事務或委員或移文宜會同商酌至事體較重
則兩城大臣應會於英噶薩爾虛畏商確再咨
什噶爾與布魯特接壤而冲噶巴什希卜察克

二部落尤為切近嗣後當欽遵

聖諭有似阿瓦勒比之守分効力者加以獎勸有似
烏默爾比之盜竊為匪者加以懲創庶賞罰嚴
明人知懷畏又如外藩貿易一事既有裨回人
生計兼可得各處信息惟減免稅課禁止盜竊
則來者益多而物價自平人心益附其阿克蘇
烏什相近之布魯特頭目車里克齊明伊勒哈
亦請給印文往喀什噶爾貿易應一體辦理現

在車里克齊來見述及入

覲時欽奉

諭旨獎其歸誠最早戒以守分安生數年來敬謹遵

奉其明伊勒哈年已七十情願入

覲懇為代奏奏入報

聞

五月壬寅

諭參贊大臣舒赫德等停止續派屯田回人

上諭軍機大臣曰舒赫德奏稱阿桂咨送奏稿請派
舊居伊犁回人一千戶可減綠旗兵丁一千名查
從前所派回人雖已陸續起程尚未完畢若再行
增加恐不無勉強從事者轉啟新附人等猜疑請
飭名城阿奇木等隨其所願不必定以年限等語
所奏甚是昨據阿桂請添派回人朕意伊等既願
來伊犁屯田自可省內地兵力命舒赫德酌定今
按奏內情形知回人等甫經安集不盡情願遷移

阿桂亦未能深悉著將奏派回人停其前往仍令該伯克等查有願往屯田者隨時遣發其原派伊犁綠旗兵一千名仍照舊辦理

戊申

諭庫車辦事按察使納世通審訊阿卜都賚求索所部情節

上諭軍機大臣曰阿桂奏稱哈喇沙爾派出屯田回人係總管阿卜都賚帶領前來今准納世通移文

現被屬人首告隨派員押回該處併將阿卜都賚
所具訴呈譯奏等語阿卜都賚係玉古爾總管阿
奇木其有無勒索情弊自當秉公究審倘係所屬
誣告亦應嚴行治罪以遏刁風若所告屬實則阿
卜都賚係庫車回人不便留於本處酌量發往葉
爾羌阿克蘇等處安置併將所訴呈詞錄寄以便
質詢

已酉

定邊左副將軍成衮扎布等疏奏解送伊犁牲
隻起程

成衮扎布等奏言臣等前奏解送伊犁駝一千
隻牛三千隻羊二萬隻欽奉

諭旨即派貝子品級公額爾克沙喇公扎木禪等挑
選牧羣及喀爾喀游牧賠補牲隻照奏定數目
於四月二十八日起程由阿爾台等處擇水草
之地過夏緩行前往復將烏里雅蘇台所貯各

色布五萬六千匹茶葉四萬四千觔駝厯八百
副酌量馱載并將原價知會伊犁駐劄大臣查
原派解送牲隻官兵三百八名續因照管什物
添派喀爾喀兵一百名前往奏入得

旨派出各官兵著一體照例賞給

癸丑

葉爾羌辦事都統新柱等疏奏添建兵房事宜
新柱等奏言查大兵凱旋後所留葉爾羌之滿

洲索倫綠旗兵丁除看守城垣倉庫及辦事處
差遣兵役外餘俱於城外駐劄後因帳房日久
損壞分居城內逃走回人房屋遇有差務一時
不能齊集今年派兵移駐伊犁其數愈減臣等
酌議現在辦事公署大門內地面寬濶可以添
建房舍請於附近山林伐木造筏由河水順流
放至城下以備物料其工役交總兵定柱糧餉
同知圖桑阿等承辦奏入報

聞

甲寅

諭叅贊大臣舒赫德查辦羅卜淖爾等處回人事宜
上諭軍機大臣曰舒赫德奏稱從前阿里衮收服羅
卜淖爾回人千餘戶及安插闢展附近之沙呼里
回人百餘戶又莽噶里克所屬回人均請交與德
爾格選派幹員帶領吐魯番回人二名前往查辦
等語德爾格甫經任事恐未能諳悉情形著舒赫

德仍于歸途之便前往辦理即此時德爾格已經
起程辦有端緒舒赫德仍須再加查核妥議具奏
已未

諭烏魯木齊辦事

御前侍衛副都統安泰等辦理傷害哈薩克之嗎哈
沁事宜

上諭軍機大臣曰安泰奏據貿易哈薩克頭目稟稱
上年伊等部落二十人行圍遇嗎哈沁百餘人被

害又烏魯木齊貿易三次內有一次來人歸途亦
曾被害伊等欲率衆追捕阿布賚云此等恐係內
地逃人當順便請示隨告以內地並無逃人爾等
所遇即宜勦捕等語阿布賚情詞甚屬恭順嗣後
伊等若再及此事仍行明白曉示令其隨遇即行
勦捕若擒獲即解送駐劄大臣處質審再伊等頭
目云曾告知烏里雅蘇台官員布達勒但成衮扎
布未經具奏併傳諭令其附便奏聞

壬戌

諭參贊大臣舒赫德通查駐劄臺站兵馬錢糧及應需駝隻

上諭軍機大臣曰現在烏魯木齊至伊犁烏里雅蘇台至烏魯木齊及回部所有臺站俱經酌量遷移設立其官兵馬匹牲隻歲需錢糧若干較之從前有無減省仍合之伊犁等處所駐兵丁共需錢糧若干較之哈密巴里坤安西駐兵防邊之時孰多

孰少著傳諭舒赫德于歸途之便親行查核其各路亦俱行查彙奏俟伊到京時與軍機大臣等會核具奏再據五吉等奏報採買駝隻數目今新疆所用駝隻不過運送什物且成衮扎布又辦駝千餘隻解送伊犁牧放孳息自屬有餘併著舒赫德查核各項駝隻足用與否若不須採買即行文巴里坤烏魯木齊哈密辦事大臣等停其辦理

甲子

命查辦西路保題綠旗官弁與內地一體陞用

上諭大學士曰此次西路隨將軍等出兵之綠旗將弁其中有奮勉効力保列一等者自應與內地保薦人員一體陞擢以示鼓勵今將軍等俱已回京而將弁等或留駐新疆或撤回內地難以分別遴選所有現在葉爾羌等處副將叅將遊擊都司守備等官著交與駐劄各該處大臣將列入一等人員按其原定考語逐一查核送部引見如已撤回

內地營伍交與該督楊應琚亦照此查辦候朕酌量簡用

丙寅

諭叅贊大臣阿桂擒解逆賊塞卜騰

上諭軍機大臣曰阿桂奏稱搜捕嗎哈沁之叅將素尼勒圖侍衛烏魯木等至巴柴河之素魯圖伯勒齊爾挈獲嗎哈沁博卓壘等十三人據供在阿勒坦特卜什隨頭目塞卜騰居住查塞卜騰若果係

戕害德舒之賊甚關緊要即令伊柱領兵一百三十名前往搜捕至博卓壘並未拒捕且係烏魯木舊屬請免其正法酌量歸併安插等語阿桂聞塞卜騰藏匿處所即派兵往捕所辦甚是烏魯木亦屬奮勉著加恩授為頭等侍衛仍傳諭阿桂若能擒獲塞卜騰即嚴拏解京博卓壘等俱照例安插叅贊大臣舒赫德等疏奏查辦波羅泥都藏匿子嗣情形

舒赫德等奏言臣等風聞波羅泥都逃入拔達
克山時曾將幼子三人攜往今據素勒坦和卓
贖回之葉爾羌回人台里卜和卓密告臣額敏
和卓云波羅泥都三子一名和卓阿什木一名
阿卜都哈里克一名和卓巴哈敦現在拔達克
山居住所有照管養育之人俱甚窮苦且慮傷
害臣等詳議若向素勒坦沙索取恐伊藉端居
奇正在籌議間適奉到養育薩木薩克之

恩旨臣額敏和卓即密傳台里卜和卓詢得實情隨飭親信屬人什丕同葉爾羌伯德爾格回人數名前往因貿易之便通知養育波羅泥都三子之回人等宣示

聖恩令其帶領來投再經過霍罕部落之要隘亦行文該處阿哈拉克齊密爾莽蘇爾令其照管前來一切俱以臣額敏和卓之意為詞其台里卜和卓等俱酌加獎許令其相機辦理奏入報

聞

平定準噶爾方略續編卷十一